

22 JUN 2002

UMNO SAMBUNG PERSIDANGAN HARI TERAKHIR BAHAS USUL AGAMA

KUALA LUMPUR, 22 Jun (Bernama) -- Perhimpunan Agung Umno memulakan persidangan hari ketiga dan terakhir dengan pembentangan usul agama dan sosial di Dewan Merdeka, Pusat Dagangan Dunia Putra di sini pagi ini.

Para perwakilan semalam menumpukan perhatian kepada usul pendidikan, yang antara lain menyokong langkah kerajaan memperkukuhkan penguasaan bahasa Inggeris dalam sistem pendidikan sekolah tanpa menjejaskan kedudukan bahasa Melayu.

Perhimpunan itu bermula Khamis dengan ucapan dasar presiden parti Datuk Seri Dr Mahathir Mohamad yang disusuli dengan perbahasan oleh para perwakilan.

Dalam ucapan bertemakan "Mendedah Yang Terbuka", Dr Mahathir antara lain menyentuh mengenai masa depan bangsa Melayu yang belum selamat, perpecahan di kalangan mereka, hukum Hudud ala PAS dan isu keganasan yang dihadapi dunia.

Beliau turut menjelaskan mengenai kedudukan Malaysia sebagai negara Islam serta menyuarakan kebimbangannya mengenai kesan buruk perceraian keluarga yang banyak berlaku di kalangan orang Melayu.

Tumpuan akan diberikan kepada penggulungan perbahasan petang ini terutama oleh Dr Mahathir. Timbalan Presiden Datuk Seri Abdullah Ahmad Badawi serta anggota-anggota Majlis Tertinggi akan turut menggulung perbahasan.

Seramai 2,033 anggota perwakilan menghadiri perhimpunan itu.

-- BERNAMA

HS AZZ AZZ